

四庫全書

集部

欽定四庫全書

鄮峯真隱漫錄卷三十七

宋 史浩 撰

致語

天申節錫宴當筵致語

天開萬世之福聖應千齡之期瑞感虹光慶綿火德奏
黷賓於舜律風入五絃玩寶歷於堯階奠餘九莢需雲
皓宴始自嚴宸湛露洪恩普沾寰海舉一十七年未舉

之縟典逢數千百歲難逢之令辰矧我名藩奠茲南服
簪纓畢萃歌頌載揚莫不瞻帝所於中天伸臣儀於北
極某官望隆八座治洽四明和通兩國之歡節旒具在
寵極一時之盛相印須提來法從於琳宮星辰燦若會
嘉賓於綺席金玉鏘然觴舉流霞一一華封之祝心馳
魏闕人人天寶之時某等叨預伶倫敢呈口號

帝眷炎圖億萬秋真人秉籙御神州通和隣壤邊聲
息仁浹羣生協氣流一扎鳳飛瓊苑詔千官花擁醉

鄉遊江城今日騰嘉頌遙認中天絳闕浮

二 昌國

雷社分封均視子男之秩天光遠矚率依君父之仁當
景命有僕之辰伸萬壽無疆之祝式頒燕喜庸錫臣隣
某官江左夷吾關中孝子他年槐路定推一日之長今
日琴堂聊闡雙鳧之化嘉與正笏垂紳之侶同為醉酒
飽德之人列坐賓朋同時僚佐半刺有全家之忠孝五
湖高紹祖之功名枳棘棲鸞踵英聲於踰竈鹽車引驥

蘊素節於伏蒲或種出山東才高吏部或羣空冀北志
並延陵或拯弊於隄防或嚴軍於刁斗更有文星武宿
莫非儀鳳祥麟觴舉流霞一一瑤臺之集心存就日人
人嵩岳之呼得不環羅綺而動歡聲奏笙歌而聞麗曲
某叨居樂部濫廁伶倫不揆荒蕪敢呈口號

邑近蓬萊萃列真曉看簪履望堯雲三呼請祝聖人
壽億載長為天下君荷柄飛香浮碧笋榴花照座舞
紅裙更聽既醉昇平雅始信宸恩浹海垠

天申節望闕祝聖致語

乾為父而坤稱母篤生堯舜之君岳修貢而川効珍茂
底成康之治屬流虹之紀瑞爰湛露以頌恩凡在羣臣
式沾宴喜恭惟皇帝陛下孝光四海道用羣心得賢立
太平之基復古振中興之業帝乃誕敷文德既躋夷夏
之安天其申命用休遂格神明之佑懽騰率土慶萃斯
辰雖富壽多男靡俟華封之祝而升恒報上敢忘天保
之詩臣等幸際聖朝叨塵樂部傾丹誠於葵藿採輿頌

於芻蕘不揆才荒敢呈口號

簪纓萬國拱堯雲遙認霏煙霽帝闈始聽嵩呼徧夷
夏便知孝治感乾坤飛一札蟠桃宴花覆千官湛
露恩歷數在躬無紀極垂衣請頌有虞尊

二 庚午餘姚

虹流華渚適丁震夙之期鳳出層霄爰錫邇遐之宴沸
嵩呼於率土祝椿算於後天恭惟皇帝陛下天覆堯仁
日躋湯聖孝格毳罽卉裳之遠恩覃草木昆蟲之微遂

底三登咸歸一德徵招作相悅之樂驩動八紘天保歌
歸美之詩聲齊萬壽但臣等謬居樂部幸際聖朝不揆
才荒敢進口號

萬國星聯拱北辰
曉看簪履拜堯雲
三呼請祝聖人
壽億載長為天下君
樂奏廣庭聲縹緲
香騰寰海瑞
氤氳太平今日非
無象花覆千官玉
臉薰

上明良慶會閣碑致語

天開萬世之真主
相得一代之宗臣
風虎雲龍自然交

感水魚膠漆不約同符恭惟皇帝陛下睿哲當陽忠賢
作輔幸遇靡勞於獵卜相逢偶在於儲潛行孔孟仁義
之言聿新初政躬唐虞孝弟之道藹著兩宮帝德既彰
皇心益眷雖丘園之歸老亦簪履之弗遺故錫華名以
標傑閣翔鸞舞鳳褒嘉忽覩於宸毫塗碧填金摹刻更
從於御府改觀四明之風月增輝百葉之子孫神靈彌
久以護持香火敢忘於崇奉臣某等叨居樂部獲覩榮
光不揆才荒敢陳口號

綿綿寶歷與天長興運重光屬我皇德洽化隆起漢
晉父慈子孝協虞唐三階順軌時方泰萬國歸心道
益昌一自臯陶賡載後于今始得頌明良

叔父知縣慶宅并章服致語

樂具四并萃珠履瑤簪之會壽祈五福捧瓊波玉液之
觴銀章綰而里社榮畫棟成而燕雀賀矧紅桃徑底流
鶯囀求友之簧綠野堤邊飛絮作舞空之雪集茲佳致
用贊清歡恭惟某官學海鯨鯢詞林鸞鷲妙齡秀發三

魁領袖於賢闕清節藹聞八課楷模於仕路高門新峙
表一時斷獄之功治服初頒壯百里臨民之寄行飛旌
於日下即持橐於禁中而某人婦道蘭馨母儀冰潔早
擅肥家之譽齊當得意之秋嶷嶷鳳雛一夔足矣溫溫
玉潤二妙居之率因琴瑟之和鳴遂享衣冠之盛事珠
簾鴛瓦頓還昔日之風光象版霞冠共挹今辰之樽俎
加以錦堂仙眷綺席賢賓來王母於西臺見老人於南極
藍綬初香蟾窟桂紫袍新翦魏家枝帽簷皆閬苑之花

蓮步盡蘂宮之侶得不祥凝鳳蠟瑞靄猊金環羅綺
而動歡聲奏笙歌而聞麗曲某叨居樂部幸對慶筵不
揆荒蕪上呈口號

簪纓濟濟珮鏘競集華堂獻壽觴朱紱始聞新命
誥青氈俄覩舊門牆梁闈琴瑟聲俱妙謝砌芝蓀氣
倍香爛醉莫嫌歡未徹從今三萬六千場

代人納壻親會致語

太守風流雅有謝宣城之標韻仙郎俊邁隱然李太白

之才華爰當遴選之秋式契好逑之意金龜印就南州
既重賢諸侯孔雀屏開東榻又得真佳壻一時盛會千
里歡謠恭惟某官文海鯨鮑士林棟榦四門曾是魁羣
彥一鶚先驚橫素秋文筆生花縹緲仙人之夢詩囊佩
錦雍容公子之遊纔過壁水蘭宮即是玉堂金馬既蘊
潛心之業宜膺坦腹之求某官江左儒宗山東相種蚤
擅賢關之譽鬱為仕路之光自持橐於九閣爰領麾於
三郡朱旛彩耀起隨步之春風畫戟凝香浮滿城之和

氣行參鼎鼐迭和堦簾乃卜良宵式開皓宴會此水清
玉潤表其川泳雲飛加以列席嘉賓星辰燦若滿堂貴
客金玉鏘然得不環羅綺而奉歡顏奏笙歌而聞麗曲
某叨居樂部幸遇伶官不揆荒蕪敢呈口號

人物宣城妙九州乘龍果是屬清流相逢解賦澄江
練上勝都歸疊嶂樓畫戟林中銀漏迴香梅影底玉
盃浮洞房咫尺笙歌沸誰道華胥祇夢遊

叔父監簿慶宅致語

殖之五畝專為養老之資處以一區止作草玄之計歷
觀今事度越前聞畫棟干雲挹四明之佳麗紅旌卷月
浮三島之神仙掃荆棘瓦礫之墻成錦繡笙簧之地宜
陳雅宴用副歡謠恭惟某官節稟松筠志全冰玉彈冠
入仕不汲汲以圖名問舍謀生恥孜孜而為利上雖識
拔中自靜恬職為國子先生人道關西夫子某人龜鶴
齊踰於耳順金蘭久著於心同既克肥家遂能考室風
簾霜瓦當年適困於狼煙翠幌珠楹茲日復張於玳席

得不嘉容萃滿堂之簪珥羣姻藹盈砌之蘭芝潤同九
里之洪河壽上一卮之芳酒某叨居樂部幸綴伶倫不
撥荒蕪敢呈口號

清曉簪裾碾畫輪更循玉砌擁蘭蓀定知廣廈新遺
址來向華堂上壽樽歌遏錦雲聲縹緲舞擡星蠟影
翩翩賸須拚卻如泥醉顯拜行符駟馬門

餘姚待縣官致語

三年有成令尹旣彰於茂績百里之內羣僚悉萃於清

流爰愷悌以同心宜昇平而共樂式開雅宴用洽清歡
恭惟知縣於道有聞與時無忤政既稱於父母仕必至
於公卿方臻羣雉之馴共昔雙鳧之去知丞人推直亮
世襲忠嘉佗時迹邁於鶴鴻今日膽寒於雁鷺曾下車
之未久已奠枕而無為屈茲宏博之材默衍權征之
利監務職惟脩舉學更優長革弊事紛若蝟興開利源
速於泉湧主簿鸞棲棘木詩滿錦囊喬雖本於王孫名
乃聯於高士縣尉官方泥滓志則雲霄聊陳宴俎之勤

用表德星之聚休取歌妍舞妙所欣川泳雲飛霞液交
酬玉山傾倒某叨居樂部幸預伶倫不揆才荒敢呈口
號

浙右風煙屬舜亭幾年纔此萃羣英棠敷美蔭連天
濶湖汎恩波徹底清醉吸霞光金盞窄笑扶花影玉
山傾定知太史先占瑞天外祥星一處明

餘姚待新宰致語

雷社分封恩視子男之貴棠蔭展治政施父母之仁漁

樵始謁於歡謠賓佐宜伸於宴喜恭惟知縣詞林老匠
挂籍真仙憲章明習如馬周絃歌間暇若言偃下車未
久盈階已底於雉馴推轂有期當路佇飛於鶚薦暫屈
浚儀之風雅將期卓茂之功名知丞佐邑惟勤於丞不
負凜凜古諍臣之氣堂堂直漢相之容滿席賓僚一時
賢德無毫髮敢奸於政事有冒襟可助於設施共欣萍
梗之飄浮得此風雲之際會莫不歌環皓齒舞轉纖腰
停牙板以劇談舉金荷而滿飲某叨居樂部幸預伶倫

不揆才荒敢呈口號

清朝出宰是郎星
牛及恢恢正發硯
賓佐雍容心盡赤
盃盤酬對眼全青
政平况是庭無訟
俗易還聞戶不扃
贏得通宵恣歡譁
看看聯翩上朝廷

代新餘姚高宰燕友致語

政績有成方喜及瓜之代
交情未洽遽為折柳之行
宜觴豆以備陳表金蘭之合
契恭惟某官美如曲逆行若
太丘官遊豈為三徑資
器局蓋是萬夫望
崇蔭靜晝來

隴登秋三年而歌有東里子產之惠舊政必告得令尹
子文之忠出祖筵開去思情切畫撓東指聊攬勝於鄆
江紫驛星馳佇登瀛於魏闕某官文園杞梓仕路驂騑
繼為父母之官爰敘子孫之好第知卓魯邂逅此時豈
識臯夔翹翔異日得不霞觥汎喜牙板敲歡恣偎紅倚
翠之遊寄卧轍攀轅之戀但某等叨居樂部幸綴伶倫
不揆才荒敢呈口號

鬱葱佳氣擁茲辰兩見姚江得主人報最已聞歌滿

道告新還喜政如神詞傳綺席鶯聲滑酒吸紅波玉
臉春休向陽闕惜分袂他年接武侍嚴宸

代餘姚高宰侍郎以下致語

陽子之居晉鄙邑人薰而善良相如之會臨邛坐客傾
其間雅一時引重千載流芳茲皓宴之攸開與前賢而
濟美恭惟侍郎蜚英文囿韞德賢闕蚤由人望之隆自
結主知之厚星輶攬轡寶殿持荷已成裕國之勲俄起
請祠之興東山雖好其如天下之蒼生北闕非遙佇拜

日邊之丹詔判院時推儒雅世載忠嘉人物品流取驛
騶於冀北文章聲價傳衣鉢於江西方欣風月以平分
遽擁煙霞而高卧佇看芝檢即侍楓宸知丞有道清芬
汾陽華裔值二松於崔砌飽聽吟哦被一鷲於禰章行
當識拔知縣琴堂訟簡棠蔭人稀飛碧筩河朔之觴會
紫禁琳宮之客莫不坐環陰雪襟敞雄風舞鬪弱柳之
纖腰歌轉編犀之皓齒但某等叨居樂部幸奉台顏不
揆才荒敢呈口號

舜亭風化儼當年人物猶追元凱賢持橐有功先計
相題輿出治亦儒先相看尹貳俱冰雪消得盃盤列
管絃欲識他時風虎變疑丞輔弼拱中天

餘姚縣燕貢士致語

三歲而興賢能雅重聖朝之舉十室而有忠信鬱為吾
邑之光宜陳觴豆之清歡用慶衣冠之盛集恭惟簪舉
某人月評望重風鑒才高久淬礪於文鋒茲翱翔於上
國新舉某人共推飽學俱在妙齡或蜚英於壁水漕臺

或馳譽於鄉舉里選畫戟門中貴公子錦囊社裏賢王
孫行追鴈塔之諸儒同上龍門之三汲某官政先儒雅
氣合賓僚式邀桂苑之羣仙來作琴堂之重客光芒書
劍相將紫府之遊雜還笙歌看取玉山之倒某等叨居
樂部幸對芳筵不揆才荒敢呈口號

玉京才子宴瑤池雪壓梅梢春近時盡道舜江登舜
牧卻歸堯殿侍堯咨鵬搏看即掀雙翼鯨飲何辭酒
百卮好是嫦娥倚丹桂擬教人折一枝枝

代餘姚李宰燕交致語

二賢接踵方惇篤於交情百里歡歌將流傳於政績既
金蘭之講契宜觴豆之肅陳恭惟某官朝野著龜士夫
領袖妙齡秀發折丹桂於堂東壯歲英蜚哦二松於浙
右承流出宰篤志愛民強禦不能屈其剛巨蠹安能移
其守始終無撓清白有聞三年而歌得東里子產之惠
舊政必告有令尹子文之忠行看鳧鳥之朝即拜筭班
之寵某官文園杞梓仕路驂騑繼為父母之官爰敘子

孫之契永言此日早暮相逢將見他時臯夔並列但某
叨居樂部幸對芳筵不揆荒蕪敢呈口號

鬱葱佳瑞藹姚州令尹聯翩得勝流報最已聞騰茂
績告新行復著芳猷歌傳白雪歡聲恰酒挹青樽喜
氣浮莫惜通宵恣談詭他年接武侍宸遊

代趙倅燕廣德守錢郎中致語

化明柯嶺偕為入幕之賓瑞藹桐川共理專城之寄眷
今守貳乃惜案察既修好於綈袍宜追歡於綺席恭惟某

官文園直榦學海洪瀾早馳譽於賢闕旋登榮於桂籍
妙齡求偶東床力拒於權門列舍舍香南省遂揚於要
職遭時隆盛被寵蕃宣芝泥已具於金鑿鷓鴣佇聯於
玉筍某官金蘭夙契冰雪交輝茲惟視印之初式啟飛
觴之會談揮犀塵共欣歲稔以時和醉倒玉山雅見情
投而氣合某叨居樂部幸預伶官不揆才荒敢呈口號
清朝登用是儒宗尤喜桐川協氣濃畫戟林中今長
貳紅蓮幕裡昔游從雲飛共慶情方洽鯨飲何妨量

有容且向山城足歡譁他年接武亞夔龍

代寄居錢明守王侍郎致語

黃堂治最方騰東國之歡謠紫檢恩隆又指西清之歸
路忠存魏闕喜動江城惟三人受傾蓋之知與千里共
攀轅之戀式開宴豆用洽交情恭惟某官宣第吏師典
型人望自蜚英於法從爰共理於侯藩汎苕水於恩波
擁鄧川之佳氣公平聽斷攬回六邑之陽和灑落文章
改觀十洲之風月未幾報政指日敷綸既資啟沃之嘉

謨宜輟藩宣之寵寄雖光榮衮服拜麻將繼於青氈而
蔽芾棠陰卧轍競留於紅旆某官誠傾三益喜餞二卿
惟茲祖帳之開用表德星之聚對歌妍而舞妙欣川泳
以雲飛韋未語離且休惜醉某叨居樂部獲奉台筵不
揆荒蕪敢呈口號


芝封一札燕泥香祖帳雍容綺席張坐上共知環鮑
謝人間爭欲借龔黃旌壇影裏傳金竿衮繡光中拜
玉皇他日回頭東海岸定應遺愛滿甘棠

寄居為諸學職慶壽致語

年彌高而德彌劭雍容雅重於老成行益顯而名益彰
惇尚是繫於先達萃羣公而宴喜承故事以流傳式當
稀有之年咸介既多之祉某人錦囊文傑絳帳經師雖
淹庠序之壘鹽實是鄉閭之領袖未嫌雪髮共餐商嶺
之芝將見蒲輪並起渭濱之釣某官誠存貴老志在移
風昔為同隊之魚今作還家之鶴爰開雅會用慶遐年
歌遏行雲盡是騷壇之珠玉談欺吐屑莫非仙里之衣

冠况皆鯨吸於百川何惜山頽於四座某叨居樂部獲
奉名筵不揆荒蕪敢呈口號

朝來太史上宸廷為說東鄞集壽星已把湖山供笑
樂更催歌舞看娉婷藍田有玉應千歲韋室專門祇
六經接武定應成福祿介眉何惜醉修齡



鄒峯真隱漫錄卷三十七

欽定四庫全書

集部

鄮峰真隱漫錄卷三十八

詳校官庶吉士臣李如筠

主事臣呂雲棟覆勘

總校官降調編修臣倉聖脉

校對官中書臣張曾效

謄錄監生臣陳秉寧

欽定四庫全書

鄧峯真隱漫錄卷三十八

宋史浩撰

致語

寄居為諸鄉老慶壽致語

就吳舍人宅

年彌高而德彌邵吾鄉雅重於耆儒少者懷而老者安
此道益敦於先達爰啟紫薇之三徑共邀黃髮之羣仙
皓宴一開歡謠四起恭惟某官某人楓宸獻對芹類蜚

聲曳蘭佩於禮義之途采芝如於修潔之圃日月為之
緩轡松椿宜爾長齡肩隨多絳縣之人袂屬皆渭川之
老當年竹馬何殊同隊之魚異日蒲輪將效來儀之鳳
嘉此一時之盛允為百世之傳合席朝簪滿門儒服謂
希有者人之齒喜見諸公而難得者俗之淳樂為是禮
豈獨成壽鄉之故事抑亦見仁里之高風觴舉流霞秩
芳筵於百拜詞翻白雪度麗曲於千秋既此肯來且休
惜醉某叨居樂部幸奉壽筵不揆荒蕪敢呈口號

海宇熙熙壽域中者儒最盛甬勾東共開樽俎為高
會尤喜鄉間有義風九老未應多白傅四明何止一
黃公行看聯壁安車上盡是當筵鶴髮翁

四明尊老會致語

癸巳

熒煌玳席萃鶴髮之羣仙縹緲獸煙祝龜齡之千歲懿
茲雅宴宜有歡謠恭惟合郡耆英滿筵碩望或縉紳賢
君子或場屋老先生學成行尊則周公其人也年高德
卽是孔氏之徒歟緩乘豹隱之安車來作龍門之重客

開府相公榮歸故里相晤少效於二疏判府顯學治最
此邦敬老尤高於九牧喜是賓朋之集共推德齒之尊
觴舉流霞偏上松椿之壽舞翻回雪克諧絲竹之音千
古美談一時盛事但某等叨居樂部忝屬伶倫不揆荒
蕪敢呈口號

東閣初開瑞靄凝曉催簪履慶脩齡風回秀發扶疎
綠喜入方瞳的皪青紗帽著花春不老玉杯浮雪酒
微醒今朝太史占艷鄴無限文星作壽星

又象山昌國

居近蓬壺雖有涉海登陸之異地均梓里初無此疆爾
界之殊矧邀鶴髮之羣仙以介龜齡之千歲宜開宴席
用洽歡謠恭惟闔邑英游滿筵者俊天隨甫里名高翰
墨之場安期羨門身筵煙霞之侶逖惟豹隱渺隔鯨波
杖屨來歟掛席無煩於浪舶笙歌作矣連裾悉上於琴
堂開府相公慶是高年為會以相娛樂知縣朝議成其
雅志開懷而盡春容千里同風一時盛集酒行北海莫

非文舉之樽壘花滿河陽本是安仁之桃李但某等叨
居樂部幸備伶倫不揆荒蕪敢呈口號

山在虛無縹緲間相望同是一鄉關欲尊德齒成高
會且遣樽壘悅壽顏歌罷青絲回雪髮舞餘文錦繞

雲鬟

闕

醉貴老行看一札頒

諸親慶賜第復會致語

闕

未返柳陰之三徑桑蓬誕日聿來梓里之羣
仙舟車遠逮於帝城樽俎先勤於王禮慶今賜第萃此

英游爰開酬酢之筵用款團樂之集恭惟埴簾伯季冠
蓋賓朋飄飄閨苑之麗人藹藹王家之吉士作福既云
相似叙情尤覺多歡上國觀光已覩龍顏之穆穆良辰
聚首更歌燕廈之潭潭厚意所將澆風可變北關真隱
東道主人念間闊之屢年思游從之舊日適諧情話頓
釋離懷茲也花擎鳳蠟以熒煌獸吐龍涎而馥郁聊具
瓊漿玉液盡邀珠履玳簪既幸四并何辭一醉人物况
皆灑落畫圖真可流傳某等身處聖朝名叅樂部輒陳

斐語用洽歡聲

鶴髮星星退急流昔年兩作鳳池游掛冠未許田間
去錫第還為帝所留騰喜親朋千里集聊持歌舞一
觥酬莫辭醉席梅花地嘉話歸傳古鄖州

諸親慶彌正彌遠及具叔懷恩命復會致語

闕

縹緲噴檀煙玳席熒煌開錦幄曾是賓鴻昆玉來

陳燕豆

闕

展初筵之酬酢恭惟

一時俊彥滿座

闕

作相闕星辰之

眷彈冠仕版已馳驥步於雲衢射策文場行折桂枝於
月窟曲敦姻契來舉慶觴東道諸賢學有家傳貴從宅
相或榮登於星省或新拜於綸恩聊洽清歡仰彰先施
某等叨居樂部幸對寵光不揆荒蕪敢呈翫斝

都城賜第起祥雲知是君王貴老人羅綺叢中喧鼓
吹樓臺影裏聚簪紳騰添風月非錢買贏得樽罍到
手頻他日華堂重此會主賓朱紫耀青春

復明守謝直閣會致語

袴襦歌洽方欣治最於黃堂袞繡光濃適慶榮還於綠
野主賓相得燕樂諧歡恭惟判府某官康樂風流東山
經濟清約足以勵風俗公忠久此服縉紳許國固出生
知愛民尤資天性使軺屢擁七閩高澄按之功郡紱再
紆三輔播循良之譽行膺芝檢即邁筭班少師夙以金
蘭式依桑梓念平生之從官方返故鄉喜舊友之相逢
乃開雅燕舞翻回雪歌轉流鶯既金竿之屢傳宜玉山
之頻倒某等叨居樂部幸際芳筵不揆荒蕪敢呈口號

鄮水鄞江喜氣浮，祇應共理得賢侯。
千帆過海欣無警，九穀登場慶有秋。
聖主正思黃霸入，仙翁方伴赤松遊。
一杯相遇何妨醉，春在西湖月在樓。

待魏丞相汪尚書趙侍郎致語

一曲煙波逸老歸，榮於故隱四筵簪。
履德星聚宴於高堂，方幸息肩宜先會友。
恭惟丞相清朝碩輔，間世耆英措坏治於一陶。
活生靈於兩國，已淹閒適當再登庸。尚書忠許一人身，兼數器久鬱經綸之業。
行施康濟之功。

侍郎紫橐論思朱轡愷悌深結聖神之眷宜膺公輔之
榮少師鶴返遼東珠還合浦喜見吾鄉我里燕樂忠臣
嘉賓恣今宵鯨飲之歡道昔日雞窓之舊某等欣逢盛
集幸與伶倫不揆荒蕪敢呈口號

燕集西湖錦繡園花迎晴曉露方晞把杯且共尋前
約握手何須悟昨非已喜一翁歸綠野更看三傑上
黃扉雲臺指日標鴻烈應許嚴陵老釣磯

錢明守謝殿撰赴召致語

釋星傳之繡衣來飛阜蓋拜絳車之芝檢笑指彤墀式
陳祖帳之歡用表攀轅之意恭惟判府某官閩南挺特
江左風流夙資康濟之才久勵清高之節數道咸高於
刺舉雄藩屢布於中和千里仁聲飽譙門之畫角萬家
美蔭敷白晝之甘棠方懷借寇之思忽聽召黃之命塵
氓結戀國士知崇少師歸憩陶居欣逢邵父歲適周於
灰琯情已洽於金蘭茲屆啟行良深惜別羽觴交錯樂
鐘鼓之清時錦舸光華指雲霄之去路但某等叨居樂

部幸遇離筵不揆荒蕪敢呈口號

玉砌芝蘭慶有餘
藹然英譽走雲衢
澄清攬轡多持節
愷悌宜民屢剖符
聖主出綸催上道
邦人臥轍蔽行途
一卮聽取臨岐語
賸吐精忠作帝謨

待明守楊少卿致語

紅旆碧幢方喜元侯之戾止
赤松綠野適當逸老之歸歟
觀光既久於朝班叙舊宜開於宴席
恭惟判府某官愛人用德
激貪以清學優思踵於關西
名盛恥居於王

後昔藩昭武飽聞畫角之仁聲今涖鄞川復廣甘棠之
美蔭已聯維月行遂持荷少師早賦歸田為氓受地始
就松筠之三徑聊同風月之一觴文字劇談笙歌間奏
但某等叨居樂部幸際芳筵不揆荒蕪敢呈口號

鄞城郁郁藹祥煙何幸分符得大賢散利士知廉律
已救荒民仰食為天仁風行見周千里雅俗俱欣受
一廛正恐最聞須召入介眉今日且樽前

復明守楊少卿會致語

職行知鎮冀北駿材山東相種蚤擅克家之譽茲膺坦
腹之求將躡要津以據素學教授文推雅健志蘊經綸
已看丹桂之敷榮更陟巍科之宏博式因擯相獲遂春
容致政太保得請休閒屬情婚嫁雖臥病於里閑猶盡
禮於賓親懿嘉耦之並逢肆芳筵而共樂迭奏柳腰鶯
舌競傳玉斝瓊杯既幸團欒何辭酌酹某等叨居樂部
喜遇良辰不揆荒蕪敢呈口號

春入西湖繞岸花十洲三島倍芳華天桃來自神明

胄玉潤生從宰輔家
男室得時諧鳳侶
孫枝有客汎星槎
盍簪此日成高會
盛事他年梓里誇

復趙倅會致語

金枝秀發方託契於葭莩
玳席熒煌荷持攜於樽俎
既衍室家之慶更增里閭之光
用秩芳筵以酬厚意
恭惟判府梁園杞梓謝砌芝蘭
暫淹驥足於吳門平分風月
行侍龍顏於魏闕擺落囂塵不
嫌鯨浪之脩途虔奉鯉庭之慈
訓爰將女弟克佐仙郎而况兩
院魚軒同辭藻

館夙明姆教來締姻聯懿風義之相交致歡娛之周洽
致政太保倦游朝著退隱鄉關尋勝事於家山日思屏
迹慕高標於閎閱已遂攀鱗嘉賓既展於恩勤東道宜
輸於款密式歌且舞賞景物之長春不醉無歸喜光陰
之難老某等叨居樂部幸預良時不揆荒蕪敢呈口號
寶緒光華是似賢遠移仙馭締姻聯高情已篤金蘭
契盛禮還開錦繡筵小奉杯盤圖報答賸陳絲竹且
留連細看四座神仙客始信西湖即洞天

納孫婦錢氏親會致語

芳傳吳越夙欽忠孝之家境接台明思締婚姻之好幸
金蘭之託契宜蘿藦之相依雅宴斯開歡謠是洽恭惟
推官系隆將相學富詩書暫參幕府之紅蓮行擁禁途
之紫橐雙鴛並駕所欣夫倡而婦隨淑女有行式副冰
清而玉潤致政太保晚歸綠野深慕赤松眷子舍之皆
賢喜孫枝之得偶既荷高軒之過聊茲綺席之張歌遏
行雲縹緲未饒於鶯舌舞翻回雪輕盈不羨於柳腰莫

辭蘸甲之瓊腴請緩出花之銀漏某等叨居樂部偶際
良辰不揆荒蕪敢呈口號

夾路紅榴取次芳三槐嫩綠影交相解裝初憩簪纓
客肆席爰開袞繡堂西子隨車騰懿德東牀擇壻得
仙郎一卮何止千秋祝更佇鳴騶下帝鄉

待明守趙殿撰致語

門巷清閒方侶十洲之猿鶴旌麾赫奕忽來千騎之貔
貅矧託襟期復聯婚好宜宏開於燕席用大洽於驩謠

恭惟判府某官璇極鍾靈銀潢擢秀蚤擅出羣之譽雅
推是似之賢三擁使軺兩行郡紘鯉庭詩禮熟聞慈訓
之餘音竹馬兒童又牧嚴君之舊治爰益敷於善化祈
仰繼於前芳畫角譙門仁聲千里甘棠喬木美蔭萬家
既平瀚海之狂瀾行作玉皇之近侍致政太保松筠三
徑觴詠一丘豈期遲暮以受廕乃獲安恬而擊壤相逢
今夕不醉何時某等叨預伶倫幸供樂事輒陳俚語上
侑歌聲

潭潭大府坐真王有子於今擁碧幢羽扇仁風辭霽
水熊幡和氣滿鄞江舞翻回雪隨清吹歌過行雲度
美腔玉笋莫辭良夜飲佇看星聚首吾邦

壻王肅之就成親會致語

銀鏤翠琯方承臘賜於九霄繡幕羅帷忽藹春風於四
座爰擁洞房之花燭式遶潭府之神仙宜有驩謠上資
雅宴恭惟直閣山東相種江右名家黃閣過庭夙推高
於是似緇衣流詠行擅美於並為乃攜華棣之賢來作

乘龍之客學士蘭陔挺秀壁水蜚英德日又新久著服
膺之譽卜云其吉遂諧坦腹之求佇聆琴瑟之和鳴永
慶鸞凰之偕老致政太保春容桑梓蕭散林泉眷言玉
女之歸果得金閨之彥既成嘉耦斯秩芳筵莫辭醞
頻行且聽笙歌競奏某等叨居樂部幸遇良辰不揆荒
蕪敢呈口號

太宰巖巖正拱辰笑看雙鳳度東津冰清愛弟為佳
壻玉立難兄處上賓火毓鵲爐香藹藹月穿梅影酒

粼粼主人賸喜機雲集唯祝聯鑣侍紫宸

待王十六監岳致語

青旂風軟繡屏陡覺於寒輕綠野泉香玉甕更聽於酒
熟爰伸樂豈以叙情親茲重客之俯臨須長謠之上贊
恭惟直閣高材烏巷藹譽白眉詞章已紹於箕裘事業
可傳於衣鉢克篤友于之義來盟宴爾之歡乃因簪組
之相逢亟奉豆觴之先饋致政太保幸從閒適喜締姻
聯既承厚意之臨斯秩芳筵之報舞翻回雪歌遏行雲

莫辭卜夜之游且洽忘年之好某等叨居樂部幸遇良辰不揆荒蕪敢呈口號

東皇旌旆到人寰漏泄春工露一斑已向江邨訪梅萼卻來燈市賞鼇山主賓冰玉歡無盡伯季埵篴興不慳欲識魯公須拜後微黃一點見眉間

代彌堅就趙府作會致語

香濃粧閣溫溫已綻於宮梅瑞藹煙堤濯濯初看於官柳率是東君之陶冶宜開北海之樽罍爰有歡謠用資

高會恭惟少保郡王天潢巨浸學圃喬林文筆生葩縹
緲翰林之夢詩囊佩錦雍容長吉之游自持橐以分符
迄建旄而胙土力行謙德簡在宸衷佇須睿命之頒即
慶真王之拜已藹門闌之喜色更欣琴瑟之和鳴華席
團欒慈顏悅懌當此良辰淑景集茲重客嘉賓恭惟闔
座簪纓滿朝朱紫或澄清而攬轡或愷悌以開藩凡生
珠玉之淵悉是星辰之眷來臨燕豈共樂歸寧茲文監
飽私庭詩禮之聞藉親聞金蘭之契坦腹既逢於知己

齊眉將底於宜家羅綺叢中笙歌聲裏舞翔鸞之六翮
介春酒之一卮幸適雅懷莫辭沈醉某叨居樂部獲隸
伶倫不揆荒蕪敢呈口號

潭潭大府坐真王中有神仙聚畫堂玉潤曾聞韻琴
瑟冰清初喜見鸞凰扶輿和氣笙歌沸馥郁春風錦
繡光他日諸孫成宅相領頭休羨郭汾陽

諸親慶壽致語

松椿林裏喬木成陰箕翼躔中老人聚耀可謂作福相

似皆由善政所薰燕喜初開歡謠斯洽恭惟判府某官
天潢毓瑞台鼎蟠基兩擁星軺備著澄清之譽三分符
竹大揚愷悌之風遂令託契之葭莩皆似脩齡之龜鶴
潁川太宜人慈容淑德華髮秀眉已登耄耄之春秋將
衍期頤之算數致政太傅晝遊錦繡日盛簪纓適當非
熊應卜之時復屆維岳降神之旦知府監簿知府安人
鴛儔偕老暢琴瑟以和鳴百九學士百十通判雁序聯
芳藹芝蘭而耐久以至宣城太孺清河秘書外黨懿親

吾鄉美行共此難老之集俱過稀有之年莫不吸沆瀣
之仙醪賞芙蓉之秋色笙歌雜遝羅綺繽紛合四座以
團樂沸千春而祝頌某等叨居樂部幸對華筵不揆荒
蕪敢呈口號

鬱葱佳氣擁叢霄又見端門遣使輶觴豆兼金真璀
璨茗香賸馥更飄飄雙旌容與留千騎三族耆龐聚
一朝正是瑤池八仙會介眉何必羨松喬

鄭峯真隱漫錄卷三十八

欽定四庫全書

鄧峯真隱漫錄卷三十九

宋 史浩 撰

致語

上梁撒帳等文附

六老會致語

鶴圃龜田渺渺壽鄉之境界桃源蓬島遲遲春日之風
光惟同生積善之家斯並享長年之慶團樂匝座豈樂
騰歡恭惟太宜人慈儉母師和柔婦則夙謹蘋蘩之職

遂揚閩閩之休致政太保知府通判監場省幹酥酪齊
名頃簾迭和有燎鬚之友愛無闕牆之嫌疑仕路聯鑣
俱擅白眉之譽雲衢接武行膺黃髮之詢雁序雍雍棣
華韡韡已繪丹青為六老更陳樽俎於一筵莫不香靄
沈檀捧玉爐而獻頌光生朱紫環芝砌以承顏可謂舉
世難儔豈非作福相似某等優伶在列盛事親逢不揆
荒蕪敢呈口號

六人四百四十歲好似同資一氣生王母蟠桃三度

熟竇家仙桂五枝榮
蓬壺影裏環嘉客
袞繡堂中溢頌聲
太史占祥應入奏
光躔南斗壽星明

五老會致語

化日舒長益衍松椿之算
清時豈樂宜繁鐘鼓之音
慶逢五老之尊來萃一筵之上
輒伸善頌用洽多歡
恭惟袞繡主人
簪纓重客
英姿玉立
崇論風生
位貴而身愈謙
則周公其人
也年高而德彌劭
是孔子之徒歟
昔嘗為同隊之魚
今並作還家之鶴
當此良辰美景
何妨妙

舞妍歌霞液浮香擁三春之麗色金猊靄瑞祝千歲之遐齡某等叨預伶倫幸逢芳宴敢呈口號上奉鈞顏

昔日翱翔藝圃中詞鋒凜凜各爭雄倦飛雅遂鴻冥志良集皆成鶴髮翁休問功名千古後且欣花月一樽同明朝太史應馳奏壽象聯珠見甬東

待權明州延提刑致語

綠野僊翁已荐辭於相印繡衣膚使茲就領於州麾既幸相逢何妨道舊宜開燕喜以洽歡謠恭惟權府某官

學海脩鱗士林茂幹昔居禁籞獨高頗牧之稱今擁輶
車兼著龔黃之譽將視儀於揆路益敦念於交情致政
太傅欣同千里之盟重託二天之託式歌且舞雖慚鶯
舌柳腰之妍不醉無歸且樂月榭風亭之勝某叨居樂
部幸預伶倫不揆蕪才敢呈拙句

山水東鄞本自佳使星臨照愈光華甘棠美蔭踰千
里畫角仁聲度萬家正喜泉香浮竹葉更看杯影浸
梅花最聞便有芝封到莫惜連宵暈臉霞

待胡少張王叔舉二孫壻致語

南國多賢夙著埴簾之譽東牀擇壻俱成琴瑟之和輒
罄歡謠以華雅燕恭惟安定學士琅邪學士才猷世濟
詩禮家傳當俊敏之妙齡蘊功名之壯志未見其止何
施不宜儒雅自將笑孫策周瑜之雜霸清明有裕無南
容公冶之微瑕同登袞繡之高堂用集門闌之喜色致
政太傅慶二孫之嘉耦陳百里之芳筵環列綺羅兼為
文學之飲鼎新絲管益侈安樂之音某不揆荒蕪敢呈

拙句

鬱葱佳氣靄鄞川
賸說侯門得二賢
天下中庸追遠躅
江東雋秀踵遺編
歌喉現皖鶯同麗
舞袖翩翩翻蝶共
妍行看聯名登虎榜
親闈歸侍綵衣鮮

姊加封太宜人慶會致語

九重貴老尊金母
於瑤池一札疏封
賁嫦娥於月窟慶
珠履玳簪之集侈
錦標鈿軸之榮不
有歡謠曷成雅宴
恭惟太宜人賦資柔淑
持己靜專勤儉為先
世仰治家

之法詩書是好人推教子之方再被寵光益彰懿德豈
唯輝華於里社抑知歆豔於縉紳得不親戚團樂笙歌
雜遝金爐毓火焚百和以謝恩玉笋翻波指千春而祝
壽某等叨居樂部幸遇芳筵不揆荒蕪敢呈口號

鄮山鄞水百祥開一軸絲綸天上來應為教忠登仕
籍遂膺錫類到蘭陔笙簧叢裏歌新闕錦繡光中薦
寶杯從此芝封須疊至長教壽母宴春臺

德翁弟轉員郎慶會致語

洪範五福一曰壽適當釣渭之年宗伯九儀六命官更
喜登廊之選宜陳燕席用洽歡謠恭惟知府監簿古鄮
偉人澄江賢牧出仕即膺於帝眷蜚英每在於王畿皂
蓋朱幡洋溢袴襦之詠紅顏綠髮雍容龜鶴之姿茲寵
拜於明綸獲榮陞於美秩行契維師之什以光貴老之
朝致政太傅滿座簪纓闔門珠藥俱預捧觴之集率懷
賀厦之私莫不祝雲路之九遷指蟠桃之三熟某等叨
居樂部幸遇芳筵不揆荒蕪敢呈口號

鄮山鄞水百祥臻天祐龍門萃達尊又見常珍登耄齒更欣華秩亞星垣龔黃政美褒宜重箕翼光騰福正繁他日老更興盛舉會看兄弟迭承恩

燕新第鄉人致語

鸞鷲鷓鴣必同棲於丹穴驂騑駉駉斯畢萃於玉關繫我四明實生多士即宸墀而射策指仕路以彈冠爰秩芳筵用揚善頌恭惟某官等熙朝俊造間世英豪或推梓里之良或擢銀潢之秀過庭詩禮家有義方比屋夔

龍人無異行洎奉承於大對乃力進於危言喜動冕旒
榮頒組綬茲功名之發軔宜燕衍之加邊致政太傅適
在耄齡欣逢盛事此時雁塔既容子姪之聯名佗日雲
衢將見友朋之引類得不笙歌雜遯語笑繽紛展醉席
於梅花拚頽山於蕉葉但某等叨居樂部幸造鈞階不
揆荒蕪敢呈口號

鄮山鄞水百祥開壯士昂頭謝草萊夏玉鏘金俱傑
出紆青拖紫正朋來未饒衛國多君子何獨山東有

相材富貴功名隨步武清時鐘鼓且銜杯

復諸親慶會致語

伏以衣繡思歸故鄉雅意友朋姻戚賞心喜并樂事寓
情俎豆壺觴式因主禮之先施斯乃賓筵之初秩是為
高會宜有歡謠恭惟滿座懿親同時重客或埴簾並奏
或鸞鳳于飛雲臻簪笏之團欒環擁芝蘭之間錯曲昭
眷誼併示恩勤勿嫌仙里之蝸蟠將見亨衢之驥展致
政太師欣陪情話聊集英標莫不泉石增輝烟霞互映

紫萸黃菊未衰昨日之馨香白鶴青松共醉脩齡之光
景某等叨居樂部幸遇華筵不揆荒蕪敢呈口號

潭府今朝雅宴開郁紛佳氣靄蓬萊笙歌叢裏環珠
履袞繡光中薦玉杯已喜羣仙來閨苑更須三熟見
瑤臺料應太史占乾象星斗森羅擁上台

寄居慶汪中嘉尚書年登七袞會致語

伏以年歷從心眉壽已臻於黃髮仕躋聽履華資又復
於青氎疊慶事於熙辰沸歡謠於宴席恭惟觀使閭學

尚書孔顏奧學稷契良臣摛文錦繡裏肝腸待物江河
韜度量自蜚英於雁塔卽擅譽於鵷行持紫索以處從
班久罄論思之職擁碧幢而臨帥聞荐揚愷悌之風勇
退急流燕居仙里訪老人於南極鶴返遼東起學士於
西清珠還合浦是宜賀客俱集適齊致政太師闔郡貴
遊同門勝侶喜修恭於桑梓恣樂飲於觥觴莫不絲竹
聲和綺羅香煖四座山頽於醉玉兩行春媚於奇葩某
等叨預伶倫欣逢樂事輒陳口號上侑芳筵

鄧山鄞水百祥開天佑神仙間世來賸喜千齡纔七
袞更祈八座上三台簫韶聲裏翻紅袖袞繡光中醕
玉杯每閱十期成再會方瞳丹臉永如孩

宴明守林郎中致語

伏以松菊未荒故老歸安於三徑壺觴畧具賢侯來駐
於雙旌賓主欣臭味之均園林暢風煙之美恭惟判府
制置煥章郎中熙朝碩望間世真儒發軔道山見羣英
之避席揚鑣星省致同舍之依仁把麾馳愷悌君子之

風攬轡有澄清天下之志適膺褒札榮鎮雄藩方敷條
教以下車已底姦克之落膽一言寬大坐回六邑之陽
和千里阜康行紀四明之德政會飛芝檢趣侍楓宸致
政太師夙慕聲猷茲披雲霧非絲非竹樂追共飲之歡
載笑載言各恨相逢之晚小遲花漏頻倒玉山但某等
獲奉芳筵慙無麗思輒陳口號上贊襟期

春融綠野日遲遲五馬相從燕喜時濕翠峯前揮玉
麈香梅影底引瑤卮適聞聖主詢黃髮將趣文翁上

赤墀且趁好天同一醉陶陶莫問夜何其

宴奉使楊御藥致語

伏以隱隱星軺擁紫霄之近侍熒熒鳳檢起黃髮之師
臣即綠野以逢迎開綺筵而燕喜宜申善頌用洽歡謠
恭惟奉使御藥太尉德義素彰忠嘉備慶受三朝之毗
倚作中禁之表儀茲奉明綸來駐光華之節行歸內闕
進登峻異之班致政太師相公夙仰賢名欣瞻英表西
湖風月正當景物之芳菲北海樽壘聊盡主賓之繾綣

得不鵲爐烟暖龍笛聲和舞翻回雪之輕盈歌遏行雲
之縹緲良辰既得沈醉何辭某等幸預伶倫叨居樂部
敢呈口號上侑多歡

神聖相承樂太平尊賢貴老有真情煌煌鳳翮飛丹
檢赫赫輶車下紫清觴豆交酬當美景笙竽合樂起
新聲客星今喜使星聚乾象森羅徹曉明

寄居慶汪中嘉尚書致語

伏以畫錦而歸故鄉已符雅志春酒以介眉壽更慶脩

齡輒奉歡謠用資燕樂恭惟致政閣學尚書德尊道妙
學富材優自登雁塔以揚鑣旋筮龍庭而持橐論思獻
納屢膺睿獎之絲綸愷悌中和荐領帥權之戲鉞誠而
接物惠以濟人惟桃李之方繁致松椿之益茂甘泉聽
履久欣閱歲之舒長神武掛冠又喜及身之彊健行見
乞言而成福祿豈唯領首以視雲初致政太師闔郡貴
游滿筵重客式因誕日同款適齋陳北海之清樽祝南
極之洪算莫不光凝袞繡歡洽笙簫一堂環擁於嬌紅

四座山頽於醉玉某等叨居樂部幸預伶倫不揆荒蕪
敢呈口號

賸喜羣仙集四明年踰七袞慶耆英三章快遂歸田
志八座爭看衣錦榮笑捧一卮龜鶴壽歡騰六樂鳳
鸞鳴舉頭莫道長安遠會見臨廳拜老更

錢明守林郎中致語

伏以東鄮號今三輔制閩方隆南閩總昔十連帥藩允
重矧屬維桑之地何殊衣錦之游小駐行麾薄陳祖席

恭惟判府某官疏通智畧灑落文章聞一善言如以石而投水見不平事若有物之嚮喉直氣英聲表望於搢紳宗論宏議結知於旒宸澄清攬轡奮風采於百城愷悌字民暢陽和於六邑陟書報最延閣陞華雖植蠹建旂寵數愈光於他鎮而攀轅臥轍去思彌切於吾鄉佇奉芝封趣歸絳闕致政太師受屢託芘傾蓋逢知方戀戀以依仁遽忽忽而言別難留行色西風飽十幅之帆少叙離情陽關釀一杯之酒某等叨居樂部幸奉芳筵

不揆才荒敢呈口號

聖主留神惠兆民循良奉詔莫辭頻纔聞五袴喧三
輔又擁雙旗鎮七閩操袂不須成作惡舉觴方喜上
通津日邊正擬登黃霸會見槐庭袞繡新

待明州權府提刑虞察院致語

伏以攬轡外臺方播澄清之譽把麾輔郡更揚愷悌之
風宜有歡謠用資雅宴恭惟權府某官風姿玉立文彩
金聲直節橫秋挺凜凜虹蜺之氣忠誠貫日稱我我獬

豸之冠爰擁星軺就憑熊軾下車未久俄騰襦袴之歌
暖席不容行趨絲綸之召致政太師受屢託芘傾蓋蒙
知喜茲王佐之材暫領民師之寄杯盤草草雖無多品
之供笑語雍雍誠有通宵之樂某等伶倫末技樂府賤
工不揆才荒敢呈口號

小春纔過氣紆徐門外旌麾正塞途騰喜二天臨制
闡卻來三徑訪耆儒酒浮沆瀣杯中液茗瀾槍旗椀
面腴且趁良宵拚一醉賜環行即上亨衢

宴明守高大卿致語

伏以紅旆碧幢分閫徧儀於南楚朱轡皂蓋部符復鎮於東鄞既密拱於皇都將逕躋於政地宜伸燕喜用洽歡謠恭惟判府某官才揆國華望隆人傑晞蹤尚父避紂而歸文王比跡茂弘渡江而得管仲不因介紹自結簡知輟從卿寺之聯旋領民師之任荐陞方伯益壯聖朝矧我四明實今三輔治先教化陽和回六邑之歡聲威讐姦克風采靜七州之瀚海行趨鳳詔即造龍墀致

政太師相公欣秩初筵敬邀五馬非絲非竹繁音已屏
於倡優載笑載言樂飲何妨於文字某等幸逢清集不
揆微材嘉與樂工同呈口號

東風昨夜到林塘千騎初臨綠野堂樂裏何煩絲竹
韻座間自有雪梅芳民安竟夜戶不閉海靜無波帆
穩張趁此清平同一醉金甌已覆潁川黃

上梁文

四明新第上梁文

伏以四明一湖適瀕郭內十洲三島俱峙水中風月雙
清煙霞互映波光動而珠璧碎岸影移而錦繡張宜有
高人得茲勝地真隱居士蚤從龍躍兩到鳳池雖微赫
赫之功名每盡拳拳之忠赤更懷止足能避寵榮望神
武以挂冠未容告老即長安而賜第猥荷眷留瞻彼松
楸恭惟桑梓昔揚子雲一區之宅備丁令威千年之歸
爰舉脩梁式陳善頌

兒郎偉拋梁東鄮峯倒影碧江中好是瓣香同祝處

兩處何妨任來往

兒郎偉拋梁下自喜平生無問舍暮途得屋可容安
一在皇都一鄉社

伏願上梁之後天清地靜國泰民康嘉與罷癘同躋仁
壽及身強健因得為千巖萬壑之游適意往來豈復憚
七堰三江之遠

明良慶會閣上梁文

伏以天地泰通適際明昌之運君臣道合載賡喜起之

歌儲兩宮藻翰宸章建千尺龍樓鳳閣爰諏勝日用舉
脩梁恭惟觀使少師相公蚤以忠誠疊膺聖眷清途發
軻依上皇日月之明潛邸扶輪契聖主風雲之會游居
揆路三八經帷富藏奎壁之光華久賴鬼神之守護乃
新層棟將奉寶函莫不杞梓成材般輸獻力觚稜金碧
既上聳於星辰棖楠丹青更交輝於海嶽宜伸善頌以
助羣工

兒郎偉拋梁東對峙森羅紫極宮好是璇霄澄霽色

交敷瑞靄繚晴空

兒郎偉拋梁西花倚莓牆柳映堤下瞰銀濤千頃闊
仰瞻畫棟五雲齊

兒郎偉拋梁南朱楹碧瓦正潭潭只有圖書供玩好
且無珠翠侑沈酣

兒郎偉拋梁北夜夜朝朝拱宸極宮堯華闕擁祥煙
芬郁穠薰酬帝力

兒郎偉拋梁上舉首蒼旻為斗帳雕欄匝走驪龍

飛旆飄颻環藻仗

兒郎偉拋梁下移得天宮來里社龍珍海藏富莊嚴
嶽鎮山君有憑藉

伏願上梁之後清寧奠位遐邇鄉風彼民此民同享三
登之樂北內南內俱膺萬壽之祺一家絲忠孝之風百
世襲榮華之慶晨昏寅奉幽顯護持確乎金櫃之堅牢
稱此木天之雄壯

竹院上梁文

伏以蕭森門徑占數畝之竹陰灑落曾襟愛兩椽之茅
屋爰諏穀旦用舉虹梁曇公長老斷岸幽芳空林老幹
頃將三昧手久住四明山棟宇一新聲名大震捫參歷
井而言旋蜀道汎梗飄萍而復至浙東野鶴孤雲誰能
羈紲好風良月到處逍遙選甚秦來漢來只圖休去歇
去適逢大士歸葺小園剝啄扣門道舊共談於妙理春
容掛錫探懷更出於新篇不居曹相之正堂聊住謝公
之別墅爰開竹院暫憩雲蹤宜有長謠用揚佳致

兒郎偉拋梁東赫赫奎出兩宮傑閣邃巖藏藥笈
四圍呵護集天龍

兒郎偉拋梁西萬頃銀濤漲碧堤桃花流出真消息
黃葉何須更上蹄

兒郎偉拋梁南朱楹碧瓦府潭潭中有毗耶老居士
環列兒孫夜小參

兒郎偉拋梁北巖若靈祠長廟食恰如李愿在盤中
呵禁不祥藉神力

兒郎偉拋梁上星宿森羅垂斗帳蒲團定起夜光寒
一炷爐薰周萬象

兒郎偉拋梁下山河大地皆虛假但將四境作西方
不結白蓮清淨社

伏願上梁之後天清地靜國泰民安庖傳不空飽香積
醍醐之供園林足樂稔平泉鐘鼓之音更將西竺之一
乘上祝南山之萬壽

撒帳文

綺羅叢裏寶蠟千枝簫鼓聲中金釵幾行神女深居紫
府仙郎穩下青霄彼人此人好是相看冰雪今夕何夕
將期結約松筠未移緩步之金蓮先啓漫空之斗帳敢
持珍果作濺雨之明珠少薦蕪詞間遏雲之雅唱

撒帳東光生滿幄繡芙蓉仙姿未許分明見知在巫
山第幾峯

撒帳西香風匝地瑞雲低天桃夾岸飛紅雨始信桃
源路不迷

撒帳南珠宮直在府潭潭千花綽約籠西子今夕青
鸞試許驂

撒帳北傅粉初來人不識紅圍綠遶護芳塵笑揭香
巾拜瑤席

撒帳中鴛鴦枕穩睡方濃麝煤不斷薰金鴨休問日
高花影重

伏願撒帳之後鸞鳳偕老琴瑟和鳴恩光浮閨苑之春
美態壓瑤池之侶畫眉粧閣攜手雲衢歲歲年年同上

翁姑之壽孫孫子子永彰門閥之榮

划船致語

伏以神聖當陽朝廷有道嵩呼鼇抃共欣睿算之穹崇
樵唱漁歌更喜時風之快樂宜修競渡用洽歡謠恭惟
紫府真仙金章貴客口吸西江水胃吞九夢波為賞重
湖來乘綵舫風亭月榭莫辭草草杯盤鳳笛龍旗共看
翩翩舟楫波光動而珠璧碎岸影移而錦繡開羣玉山
頽英詞鶯囀豈獨發揮清泚且不辜負昇平但某等天

際鳴榔煙中釣月已喜膾珍得醉更來鼓棹騰歌不揆
荒蕪敢呈詩句

鄮城中有水晶宮佳景偏供漁舍翁酒船撐開萬山
綠醉帽插破千花紅魚龍浪捲空中雪羅綺香生水
面風俗樂時豐君賜予人人舉手祝蒼穹


又

伏以鄞有西湖古稱洞府蔽空花卉四時之錦繡鮮明
極目煙波萬頃之琉璃瑩滑好飈桂槳快引龍舟喧喧

畫鼓驚雷隱朱旗拂電錦標奪去價珍萬兩黃金玉
醕傾來光印一輪明月用開宴集以樂昇平恭惟東道
主盟南州重客坐環冰玉面揖湖山俱為珠蘂之神僊
來作煙霞之伴侶痛拚劇飲爛賞良辰但某等素習權
歌老居漁舍覩風光之明媚樂樽俎之雍容不揆荒蕪
敢呈口號

十里平湖一鑑開羣山聳髻入粧臺最宜縹緲蒼煙
際遙見翩翩畫檣來簾捲玉鈎春映水標爭繡段鼓

鳴雷莫辭醉席梅花地
報答風光是酒杯



鄭峯真隱漫錄卷三十九

欽定四庫全書

集部

鄭峰真隱漫錄卷

四十二

詳校官庶吉士_臣李如筠

主事_臣呂雲棟覆勘

總校官降調編修_臣倉聖脉

校對官中書_臣張曾效

謄錄監生_臣陳秉寧

欽定四庫全書

鄧峯真隱漫錄卷四十

宋 史浩 撰

銘

李長源求墨銘

煙滅灰飛知白守黑旂常竹帛得是而章蓋其英采亘
乎百粵之南而馳乎大漠之北嗚呼是為吾友松滋侯
之德

真隱園銘

予生賦魚鳥之性雖服先訓出從宦游而江湖山藪
之思未嘗間斷故隨所寓處號曰真隱太上皇帝知
之賜以宸翰百拜跪受即有志闢芳園揭扁榜以對
揚休命萍梗南北未遑也已而際會龍飛兩承相乏
丐閒得請今上皇帝燕饒內殿親灑宸章光其歸路
賜西湖一曲以成其志斥白金萬兩以竟其役而皇
太子又大書四明洞天并以珠玉妙作為贐於是始

得累石為山引泉為池取皮陸四明山九詠髣髴其
亭榭動植之形容而園遂落成又即園之左建大閣
以藏兩宮墨寶琅函層出金碧交相翊以龍神見者
知敬既即塵囂闐闐中立此清淨境界固當體聖主
好生之心守家世止殺之戒期傳永永無有染淪所
以嚴宸奎之奉而實洞天之名也或者難曰園林窮
勝事鐘鼓樂清時未聞以止殺為戒也予曰我欲有
鐘鼓園林之樂而使鱗介羽毛常被銚刀鼎鑊之苦

此豈仁人之用心也哉或又曰脯醢已具無割烹以動吾不忍之心亦何為而不可予曰作法於貪弊將若何杜漸防微必并是絕之采芝擷果陳藥苗列山蔬顧不足侑一醉耶覲我後人善保此意守而勿失有不然者明神監之俾竟其身無有樂事

真隱名園地偏境勝既曰洞天貴在清淨藹藹遊人仰睇奎文必恭敬止實為尊君僊真是明母糝腥穢子孫儻賢呵禁敢廢咨爾攢峯列嶽之靈守護億載勿寒斯

盟

退居座右二銘

尊生銘

洗眼揩牙摩腰熨腹常須忘口閒或濯足載寢載興無
思無欲百疾不生是汝之福

解曰身為親之支知者重如寶但使吾身安國家斯
可保人言身本無夢幻匪堅好若還無此身從何而
得道

益己銘

人生有過苦不自知怨汝詈汝當省其私言之而是愛
之重之求全責備是汝之師

解曰怒火起毫末縱之能燎原唯持忍一字久久德
彌尊昧者失此理動欲開爭門應時不撲滅萬古成
冤竟

不欺堂銘

曾甥種學方進而未止榜其室曰不欺足以知其中

之所存乞銘因作數語廣其志淳熙戊申元夕書於
四明里舍之清涼境界

惟人有己妙在中局一念不欺表裏相應天地奠位日
月炳明鬼神叶吉寒暑有經以此許國忠無不形以此
盡孝親胡不寧蔽以一言命之曰誠苟或背此是為頑
冥末如之何終身不靈咨爾後學其警吾銘

尊勝庵鐘銘

真隱居士作屋數十楹在鄞城之東乃以錢銀山榿

易護聖院之荒地將建寶閣專一崇奉太上皇帝御書已蒙諸皇賜名尊勝庵親筆扁榜光耀林泉住持清文又能市銅於官作鐘以警昏旦為之銘曰

鳧氏製器其名曰鐘諧和眾樂清廟辟雍降及後世徧滿梵宮危樓百尺萬鈞在鎔一冶而就厥聲孔洪假爾眾手破天下聾人生冥冥昏曉無窮忽然震發有耳皆聰度垣驚遠擊散羣蒙及乎無作復歸於空清淨之體實與道同盡未來際悉悟圓通

雜說

孟子

同道

聖人之道體常盡變故禹稷顏回易地皆然其道同也
孟子言此深闢乎楊墨亦務聖人者也然所以卒至於
無父無君以其執一不能變也一者何也兩端之謂也
楊子執其一端曰吾守聖人之義墨氏執其一端曰吾
守聖人之仁槩之聖人迹相似矣彼獨居陋巷有似乎

不肯拔一毫三過門而不入有似乎摩頂放踵然而禹稷顏子於道固能變楊墨執一固不能變孟子所以深闢之也

可欲

世之可欲者皆善不可欲者皆不善自然之理也今夫盜賊是甘心於為不善者也是已陷溺其良心而不可救也然而有人焉指之曰盜賊則必怫然而怒目之以仁義則必翻然而喜是其可欲之心本在也人能克本

在之心反身而誠則知其不自我樂而信其有諸己矣
擴而充之何所不至

荀子

性惡

荀卿性惡之論謂不待習而能者性也待習而後能者
偽也故以桀紂為是而堯舜為非夫性者善惡俱泯之
謂也以桀紂為性是猶指田之禾黍待殖而生稂莠不
待殖而生遂以田為專毓稂莠過矣胡不自二者未生

時觀之今人乍見孺子將入於井非納交要譽之心怵
惕惻隱油然而生一念之善夫豈待習而能乎雖然人
雖本善若謂善即是性則是指禾黍以為田其失與御
等也

文中子

存我

人臣事君當國爾忘家而仲淹贊周公乃曰外不屑天
下之謗而私其迹曰必使我子孫相承而宗祀不絕內

實達天下之道而公其心曰必使我君臣相安而禍亂
不作深乎深乎國家所以寧社稷存我所以厚蒼生嗚
呼仲淹真知周公哉今夫人臣至於以身徇國必其身
不勝其國而至於亡也若夫周公知天下之道傳於我
天下之治繫於我期有以厚蒼生也孟子曰萬物皆備
於我則我者真萬物之根本也聖人能存一我則天高
地厚萬物散殊舉由我一身而治可不重乎

春秋

文中子曰春秋一國之書也玄經天下之書也夫聖人雖約魯史而修春秋其實非一國之書也所以懼作春秋豈非為天子之事乎百王之道萬世之法粹然大備十二公二百四十二年之間增之則為贅損之則為闕知我者其惟春秋乎聖人之門游夏在文學之科而於春秋不能措一辭非不能也彼親覩其道之大其法之備不敢贅一辭以蝕聖人之經也仲淹出數百歲後乃以玄經續之則其以春秋為一國之書也宜矣

韓子

受福

韓子言儒墨同道乃以夫子祭則受福為類乎墨氏之明鬼且夫子之道貫通幽明方且與鬼神合其吉凶故其祭也不徼福而福自至使其得邦家則當神祇祖考安樂之無他得其道故也而韓子乃以比墨氏之明鬼異哉或者謂此文非韓子作誠有是理蓋儒墨之判久矣韓子既有意乎尊道乃退佛老而進墨翟非其類也

讀者宜精思之

頌

聞家中被盜作三頌勉之

年饒穀擁困羣耕盜賊都從此輩生料得欲偷偷既得
從今改惡不宵行

幾年補破得遮寒今日空餘赤肉團從此便知元不有
細書詞理枉經官

孟光衣服合山居煙褐明青休著渠欲得此曹心不動

只將荆布在冠裾

羽客熊葉二師言歸鐵柱以五十六言餞之

喜見洪都二散人直疑吳許是前身看梅始識林和靖
載酒還尋賀季真鐵柱擎天龍已蟄星壇近斗月為鄰
思歸却有他年約來慶吾登九十春

偈

次韻賁長老

露地當年說白牛反令後學莫能由足行香陌無窮轍

家在清江欲盡頭
巖頓除猶是病因緣未了且乘流
此山日夕浮佳氣見則何煩蠟屐游

適過寶奎壽居仁師出示王判院偈真隱老子走

筆次韻

見了黃梅留一宿此風久矣無人續相逢誰許問寒暄
箇中且自龜藏六壽師嚴冷面如鐵背負真乘腰不折
有時禪定出塵表兀坐蒲團頭滿雪平生俗物不掛目
終日翻經聊自足不離當處常湛然波澄倒影千山綠

邇來邂逅文中虎一幅水藤為下語我今欲贖沒因由
只把茶甌對趙州

雜著

書地宮

天錫史氏演慶鄞川子孫百世忠孝兩全門闌烜奕簪
組蟬聯與國同休亘千萬年

養生戒

畫

人生疾痛皆從口得生冷果蔬非徒無益羹汁酒漿助成飲癖鹹酸醢醢斷不可喫蟹蛤魚蝦何如肉食申喉下咽化為痰積戒之戒之康寧無極

夜

老氏有言少思寡慾思之為害心氣馳騫氣乏形枯神菟耗促慾之為害精去不復浸淫不已速其傾覆所以古人虚心實腹戒之戒之為汝之福

鄮峯真隱漫錄卷四十

欽定四庫全書

鄮峯真隱漫錄卷四十一

宋史浩撰

楚辭

葬五世祖衣冠招魂辭

維蒼姬之建僚兮目載筆曰太史冊祝冊誥光明於汗
青兮袞榮撻辱蓋權輿乎此或揭揚崔杼之逆節兮或
形容魯僖之壽祉或者絳老之脩齡兮或號遺直而如

矢列國各有柱下之官兮職在非非而是是其中必有
一人兮褒貶膺符於天理天乃錫予時君兮俾因官而
命之氏既因典籍而得姓兮後當以文而暢厥緒逮羸
顛而劉奮兮有樂陵安侯之二子武陽尤其拔萃兮伏
青蒲而定國嗣羽翼叱咤而成兮亶追踪於園綺嗟東
都之叔暮兮黨錮之獄忽起跨郡國之幕布兮網羅密
而不弛壯哉平原之相兮力拒大索之使指謂吾境內
之獨無兮迄並逴於殊死活千人者必封兮今所活不

知其幾懿二賢之相望兮培根莖於元始本益固而不
拔兮榦亭亭而葉嶷嶷歷三國六朝之寂寥兮慶復鍾
於仙李論一相於女主之朝兮勲烈或遺而弗紀更五
季之齷齪兮人物無惑乎頽圯惟穹昊之有意兮醞釀
停蓄而未止迨天開於巨宋兮英淑之氣尚蟠乎千祀
自杜陵而侯溧陽兮捨溧陽而遷徙既游宦於東南兮
遂卜蔭鄞之桑梓方躬耕於農畝兮故韜晦而弗仕憫
孤弱而賑窮苦兮唯勤勤乎積累暨吾五世之祖兮始

著令名於州里富刀筆如蕭曹兮踵于公之業履斷以
法而從恕兮每哀矜而弗喜遺高祖以清白兮立里門
而高峙濬清源於兩世兮蓋接夫前修之派委茲濫觴
於涓流兮遲泓澄而演迤故我曾祖之擢秀兮篤孝恭
於髫髻甫弱冠而襲役兮勵廉勤而從事郡有西湖之
勝絕兮十洲三島錯乎城之裏臥雙虹於澄碧兮危亭
翼然於中泚分競渡於波間兮游艦舳艫相銜尾挽姻
友以出遨兮彼莫能承親之志余獨揮金而治具兮列

瓊羞而行桂醕慈顏悅懌而夷猶兮不惜蘭世之頻艱
大吏恚其不告兮竟蕭條於任使氣怫鬱而短折兮哀
痛淪於骨髓曾妣惇惇於笄歲兮幸遺腹之孕瑞父母
欲奪而嫁兮情實憫其貧窶誓弗許而守義兮撫孤嬰
而獨處欲吾飽他姓之粟兮寧為史氏之餒鬼乃反尤
其怙恃兮誚之曰不諒人只意天欲衍吾宗之脩系兮
乃特畀夫烈女祚節義之超卓兮實神祇之所與享耄
期而康寧兮簪裾雜遝而歡聚瞳點漆而顏渥丹兮揚

厖眉而啓兒齒比談笑以考終兮五福人推其全備祖
考憑藉其餘休兮起攀孔顏之逸軌映雪囊螢而精勤
兮蓋乏膏油之繼晷雍容閒雅而甚都兮孝悌忠信莫
之比叢八行於一躬兮播仁聲於遐邇屬在位之推轂
兮升鶚書於當宁卒辭聘而弗至兮若陽城之居晉鄙
祖妣竭力以事姑兮甘脆之貲每斥於簪珥蠲縻繁而
勤縫紉兮蓋無資於娣姒收遺孤而字育兮男有立而
女歸於賢士通六經而口授兮五男訖臻於肖似聞詩

禮於過庭兮又奚慚乎孔鯉皇考七歲而能詩兮應聲
揮毫而落紙出健句以驚人兮坐客不敢以孩視踰志
學而造橋門兮文甚工而貌甚偉世僉期以超詣兮謂
王公可以翹俟當宣和之全盛兮風俗窮奢而極侈立
州橋而睇峇堯兮不覺歎歔而流涕乃拂袖而出關兮
歸即謀於避地衆方駭其無倫兮曰盛極亂危之必至
及塞馬之南牧兮中原羣盜如蜂蟻人始服其先見兮
竟以憂國而亡矣勿傷乎秀而不實兮將蓄地力而獲

拒程妣氏盛年而嫠居兮泣血幾昧於雙背靡芳珍以
饋尊章兮躬和柔而化妯娌叔季析產而遜田兮吾不
瘠衆而腴己章行見稱於宗黨兮欣怒不形於臧婢享
上壽而封大國兮富貴衰榮之莫擬仲父決科而結綬
兮藹聲華之熒熒時皆矜式其靜退兮帝忽獎拔而睠
倚陟西樞而籌謀兮國威振而兵弭圖施設而未究兮
大其後而可擬季父服義方之訓兮幼已見其材諳幹
蠱初裕於一家兮摛文兩登於鄉舉人爭睹其犇逸兮

倏如有物尼其趾彬彬二叔之肩隨兮行藝均表於庠
序儻天假三人以年兮夫豈布常而但已匱良金而韞
美玉兮坯璞盤盂與符璽顧瑣質之叨塵兮躡美彤墀
而面丹宸一言偶悟於宸衷兮迅涉龍潛之淵渚執遺
編而侍席兮蒙真人之傾耳扶日轂而升黃道兮感風
雲於尺咫廁紫微而逕玉堂兮兩承乏於端揆雨露涵
濡於姻族兮燦盈門之青紫謂余有瑰傑之文兮文實
慙於骫骳謂余有卓異之行兮行實嫌於委靡然則曷

為而致茲兮豈非詒厥為之基址荷睿主之錫類兮寵
吾先而降旨建家廟於私第兮獲祠五世之考妣乃敷
陳其幄帟兮乃饋薦其芳芷恭惟五世祖考接遐系而
起身兮妣淑柔而儷美高祖考負脩能而世濟兮妣繼
踵同功而比義向非五人種德之深厚兮何以衍裕昌
熾之如許乃無蓬顯以托葬兮誠為後裔之深恥爰即
耆老而咨詢兮謂吾家振跡於耒耜凡厥親之云亡兮
用浮屠之法而燔燬奉靈輅於佛刹兮擁香花而窆諸

水今既無策以救藥兮敬具衣冠招魂以葬爾乃招曰
魂兮歸來煙嵐縹緲氣鬱葱些幢幡歲旌旆瓏璵些虬
螭蜿蜒以載路鸞鶴婉孌而翔空些仙祇導從於先後
擁雲輶而離梵宮些靈洋洋而至止咸憑依於像容些
慨幾年之飄泊茲有宅於湖之東些合夫婦以同穴樂
洩洩以融融些遵先王之禮法復中土之儒風些歸來
兮受福無窮些魂兮歸來東方不可以託宿些黃潦漲
乎滄溟銀浪駭而成屋些洶湧澎湃不可以停足些妖

豚惡鰐利牙爪吞巨觶而入其腹些歸來兮恐遂罹其
毒些鬼兮歸來南方不可以謀安些封狐雄虺瘴煙蠱
毒之相奸些淫巫非族膾人之肝些作禍得食牲酒瘡
酸些歸來兮彼多賊姦些鬼兮歸來西方不可以求處
些流沙不毛荒瘠斤鹵些黑水幽杳鬚眉莫睹些弱水
渙散一芥不負些金風淒急敗葉屯聚些歸來兮去孰
與侶些鬼兮歸來北方不可以卜居些朔吹震地層冰
塞衢些陰雪皚皚逐馬垂車些跣則墮趾袒則裂膚些

鵝禽獍獸凍餒天殂些歸來兮往彼何圖些
蒐兮歸來莫超天上些剛風迢遙迷雲翳障些
慧孛攬槍妖魔跌宕些忽九關之洞啓神戈
揮霍而掃蕩些歸來兮茲不可嚮些蒐兮歸
來請勿思返於下方些沈泉凝沍白骨如霜
些積薪居上覆壓成岡些歲久不腐徒隱痛而
盡傷些追惟曩日寂寞備嘗些歸來兮不可復
當些蒐兮歸來入佳城些氤氳紛郁和氣蒸些
清飈習習度綺櫺些綵雲容與紫簷楹些萬象
森羅垂清冥些璧月注射

穿簾旌些衣衾棺椁必信必誠些石麟羊虎班幽庭些
金雞玉犬昕夜鳴些蒐兮歸來合禮經些天地四方多
艱虞些唯此宅兆當奧區些攢峯沓障翠羽敷些澄陂
練淨湘簟鋪些木潤山輝韞璠璣些圓波媚川崖不枯
些孱顏爽塏神明扶些鬱然深秀發此膏腴些造化融
結從古初些蒐兮歸來奠靈輿些梗楠豫章蔽高厚些
檜栢篔簹掃塵垢些風過聲清琴瑟奏些月明影動龍
蛇走些桃杏拒霜擣組繡些簷蔔梅英刻瓊玖些來禽

海棠炫春晝些丹桂飄香滿巖窰些衆芳姿媚松楸茂
些菟兮歸來據岡阜些東風芳草生池塘些秋月荻花
凝雪霜些蕙蘭芬馥菊蘂芳些芙蓉出水勻靚粧些餘
釀金沙蜀錦張些芍藥千畝環花王些啞喋鬚蘂鶯燕
忙些採掇粉膩蜂蝶狂些連阡累陌春不藏些菟兮歸
來宅幽堂些鶴歸華表語千齡些鳩呼屋角雨新晴些
啼月杜宇喉舌清些舞風振鷺飄雲霓些西疇鷓鴣催
春耕些支尼朝噪虛窻明些埴篔迭和鴻雁征些靈鳳

登岡簫韶聲些萬籟鼓動俱和鳴些
蒐兮歸來樂泉局些牛羊被野風塵絕些
豺狼遠遁妖狐滅些猿狖攀躋韻清越些
空林豹吼聲激烈些騏驥追風汗成血些
白鹿銜花曜春雪些朱雀玄武山嶮嶠些
青龍白虎勢截薛些爭隨四獸森其在列些
蒐兮歸來寧吉穴些長鯨吸川興道豪些
頽鯉化龍崩浪高些荷翻珠露白龜巢些
荇線牽風錦鱗跳些鱖鱣同隊挾長蛟些
蓬島顛顛駕巨鼇些蚌螺蛭蛤類岬嶠些
時出光怪浮波濤些珠

宮貝闕繚周遭些
鳧兮歸來鎮神皋些
麥翻碧穗禾青
秧些彌望沃若栽柔桑些
秋刈黃雲秔秫香些
春盆雪繭縑絲長些
萬家比比居家傍些
豐濃口腹饒衣裳些
咸知榮辱人善良些
衆心成城勝堵牆些
世世守衛呵不祥些
鳧兮歸來安厥藏些
芙蓉為裳薜荔衣些
紉荃佩蕙光陸離些
鷓鴣金縷羅帶垂些
孔雀鸚鵡周屏帷些
鮫綃蟬翼夏暑宜些
鸞氎絨毳冬熙熙些
步障數里香風隨些
鳧兮歸來錦繡圍些
谿山擊鼓助雷驚些
春

釀醇醲麴米成些石鐺蟹眼松風鳴些沆瀣醅浮竹葉
清些睡魔紛紜槍旗征些酒兵賈勇墮愁城些三杯滌
慮消春冰些七椀未啜兩腋風生些稱賢樂聖通仙靈
些翹兮歸來惟醉醒些蓮房芡實水所綻些棗栗榛榛
日以曠些陳梨孫瓜剖銀瓣些盧橘溫柑累金彈些揚
梅全白玉璀璨些蘋柿萬株紅葉滿些櫻桃累累珠可
貫些荔子初丹風帆走獻些加邊之實多益瓣些翹兮
歸來敬德產些紫芥綠菘擷芳圃些芹韭菁菹配醢脯

些尊瑩冰絲鱸玉縷些間以章舉馬甲柱些蝦魁蟹螯
海錯聚些魚羊擊鮮悉堪下筯些百珍餽飮升豆俎些
駢集馨香侑稷黍些禴祠烝嘗惟所取些覓兮歸來其
勿吐些惟人覓氣必上升些體魄歸地或相纏縈些久
依梵唄圓禪扃些貴賤雜糅薰蕕并些子孫悠悠貪利
名些誰曾著意哀幽冥些一朝擺脫來仙瑩些堯舜文
王路砥平些逃墨歸儒道愈明些覓兮歸來合禮經些
亂曰層臺業岌兮一篲先大浸渺瀰兮繇滌源人本乎

祖兮胡可後英靈儼然兮如在左右一念感通兮來奠
居九原可作兮嗚呼在茲雲馭逍遙兮翠旂舞時節遐
征兮朝帝所友日月兮朋列星昭回潛德兮交相發明
佑我後人兮縣百億萬乎歸來兮慶無極

鄧峯真隱漫錄卷四十一

欽定四庫全書

鄭峯真隱漫錄卷四十二

宋 史浩 撰

祝文

祈雨文

旱既太甚苗則稿矣惟曰怨咨末由也已我祖東山坐
看雲起龍乘是氣震驚百里三日以往霖霖既優勃然
興之乃亦有秋農夫之慶迄可小休神之聽之無作神

羞

赴餘姚尉辭先墓祝文

仰惟祖宗修身謹行內無諂曲真古之遺直也孝義藹
聞不克顯用真古之遺逸也天實祐之俾裕厥後不嬰
殘弱本夫祖宗有全生救難之心得保其遺體也不逢
夭折本夫祖宗有愛人利物之心得藉其遺休也不遭
窮窶本夫祖宗有周急普濟之心得承其遺德也不墜
衣冠本夫祖宗有樂善好賢之心得奉其遺訓也嗚呼

祖宗奕世積累不越乎方寸之內而使子孫憑藉如許
退顧微躬無一毫之善其何以得此是以夙興夜寐未
嘗不感念祖宗之遺蔭也茲始效官得尉劇邑視姚虞
之遺黎也瓜時已及涓日啟行期無悔尤永底寧謐不
無賴於祖宗之遺烈也尚冀鑒臨錫以如欲誓言當謹飭
以廉易貪以孝移忠庶紹祖宗之遺風也

祭窰神祝文

比者憲臺有命埏埴是營鳩工彌月巧歷必呈惟是火

齊造化杳冥端圓縹碧乃氣之精茲匪人力實繫神明
是用奔走來輸其誠有酒既旨有肴既馨惟神克享大
侈厥靈山川輯瑞日月降晶俾無苦窳以迄有成

倉王祠成設祭祝文

上古結繩未造典籍天開聖人遠取鳥跡肇興斯文作
萬世式翥鳳翔鸞奔泉快石充棟汗牛層見疊出推原
本始實繫神力功烈焜煌覆被今昔矧此司宗圖書是
職貌象弗崇祠宇弗飾官吏過之孰不愧惕乃鳩厥工

有事茲役迄月而成煥發金碧揭虔妥靈侑以馨必神
其鑒歆益行丕德佑我天子閱歲萬億慶裔繁昌垂光
赫奕玉牒所書斯無紀極恃神之休永安廟食

考冥忌設祭祀文

少遭閔凶遽失所天先考即世實在盛年雖有誕日莫
展慶筵今已五紀木拱層巔敢陳宴俎追記生前尊魂
有知尚鑒精虔

妣喪大祥設祭祀文

某等罪逆不孝禍不自滅上延先妣日月迅速遽及大
祥曾事死之未周乃禫除之斯屆哀心不盡禮制有終
追慕既深攀號莫及敢資芳苾少薦悃誠伏惟英魂俯
垂歆鑒

重陽祭神祝文

惟神正直聰明世享時祀茲因重陽致此薄奠神庶歆
之恪勤厥職俾我閭閻永底安樂

奉安西塘鄭先生神像祝文

某自幼學與閩士大夫游熟知諸先生姓氏恨居不同里生不同時無以究考德問業之誠垂老此來始獲瞻謁列像而寸心慕用猶恐或有逸遺訪之鄉彥乃聞公之餘風當抗論不屈雖流離嶺海陸沈下僚其氣與文猶雄豪勁正率不少讓世亦罕有知之者是用寄之丹青嚴以香火若節春秋俎豆諸先生之列非惟補先祠之闕抑使邦之學者咸知有公起敬起慕於風化為有助焉祇款之始薄酌揭虔伏惟凜然若存實鑒臨之

奉安鄭先生神像告先賢

伊惟羣賢圭璧琳瑯世之相後萃此一堂坐無公車屬
我西塘爰求貌像得自家藏祇安于序均奉享嘗英資
儼列玉立交光諒我羣賢死而不亡雲龍風虎相得益
彰高標所激興起一方歲事伊始敬酌此觴

夏至家祭告門丞戶尉文

守關鍵呵不祥神之職也某以節屆夏至將歲事於家
廟顧飈馭之來仰瞻闕閱何莫由斯敢先以告冀神鑒

歆俾我祖宗來燕來寧毋有所畏而弗至則神之惠也
庶幾祖宗克綏厥福以裕我老稚俾奠厥居以永雍衍
衍之風惟神亦享無窮之樂

妻冥忌設祭祝文

某少也數竒家道貧窶攻苦食淡有人所不堪者夫人
備嘗之而不憾惟一意以奉慈親故於夫人誕日未嘗
得以一杯為慶意謂異時偕老為之未晚也迨予暮年
遭遇盛世致身顯榮而夫人竟不及見每一念之痛心

如割今者復值夫人冥忌之辰某適奉祠還里冒涉修途又不敢以是廢禮謹與兒女等就州孝順鎮太平寺營辦菲食以寓追思之誠惟靈其鑒歆之

立西塘鄭先生祠預告諸先生文

某職在宣化曷使俗移道以刑政德禮或虧合求前修風勵一時廉貪起懦庶其在茲惟西塘公卓行可師微官落拓世所罕知仰止高山莫不先祠用涓良日敬奉表儀列之像繪以時享之邦人交贊先生無遺有核在

俎有酒在卮敢以預告尚鑒我私

福州諸廟謝晴祝文

吏治無術無以惠民曰雨曰霽輒號于神陰雲四收淫
雨旋止惟神之功吏則知恥嘉穀滿野神賜則豐清醴
匪報惟以告衷

新造器皿祭神祝文

器皿乃長物之累杯觴為狂藥之媒雖已知非未能免
俗敢同蘋蘩蕝藻先薦鬼神王公庶幾受用而安固匪

徼福而作伏惟如在俯賜來歆

謁曹娥廟祝文

某自罷相東歸幾十五年每過祠下非擁旌麾即趨召
節聖恩深厚皆神力有以欣助之是用躬致款謁以謝
神休惟神敷佑益畀丕澤使異時功烈之成掛冠歸老全
璧無瑕則始終大賜其敢弭忘

重陽祭宅神祝文

惟神正直聰明世享時祀今茲秋報

上巳云春
祈式屆

疇敢不

虔庶幾歆之恪勤厥職俾我闕闕永底安榮

男彌遠受官告祖先文

某奮自寒素遭世盛明今者聯班孤傳賜第寓京子弟亦受國恩寵通籍金闈此一門之榮已極通顯矣今天子有事合宮恩及臣下某等三男彌遠復被榮秩某竊惟一介之士自束髮讀書幸而掇取儒科官不過末品其得預京秩者是惟集英第一之選三年而僅有耳今彌遠年未幾冠起家而安有之此非祖宗厚德畀遺後

人何以及此雖然某之所期望於彌遠者當思所以稱其恩光不願其志效一官而自足也繼自今方從師親傳日長月益庶幾其遠者大者惟祖宗之靈陰隲默佑之俾之自幼學至於壯行由小成進於大成卓然有立無忝我祖此則某暮年之幸亦吾祖宗所賴於子孫世其家聲者也祇命之始于以揭虔敢告

妻弟貝叔懷以外弟受官告妻文

某起自單微置身通顯慨念糟糠之偶艱苦同遭逮今

可以安佚而夫人既往雖大國屢封而報之之心猶未
既也追念昔年夫人卧病而夫人第待舉實躬湯劑之
奉夙夜不懈屬纊之時命我曰君苟富貴無忘吾弟音
容雖遠歲月雖深言猶在耳不敢忘去今歲季秋天子
歲事於明堂凡在措紳以顯秩得薦其子孫中表是用
以異姓之恩授之待舉茲因拜命敢告

冬至謁先聖祝文

先聖道德之言垂於六籍仁義之教覃及萬代生民獲

處禮樂之鄉仁義之域繫吾先聖是賴臣起身布韋致
位將相豈不知所自耶是用嚴恭廟像莫於家塾屈致
賢師奉宣微言將使子子孫孫孝悌忠信德行道藝萃
於一門以行先聖之道今茲陽至敢薦苾芬以彰歸思
報德之意

入賜第謁先聖祝文

先聖之道無往而不在則先聖之神無在而不形神無
在而不形立像以求之非謂神專在是也蓋欲接之於

目而著之於心爾某荷上異恩賜第都下茲涓吉日潔
家來居欲子孫無一日忘先聖之道故欲子孫無一日
不存先聖之神謹即家塾恭迎聖像爰及羣賢敬薦觴
豆神其妥之以默裁我子孫之文

建新第奉安四明山王并謝遺塵先生神像文

某常聞之孫綽曰涉海則有方丈蓬萊登陸則有四明
天台皆塵外之窟宅神仙之所憇息者也某生長四明
自謂方丈蓬萊與夫天台固難即到四明在吾桑梓咫

尺不知其所可乎是故游雪竇登杖錫訪四明之真境
人莫之知也意者墮於荒唐其實無有晚觀松陵集見
皮陸所紀謝先生之祠始知四明真有是境第無仙風
道骨不能到也然心常念之不忘去歲秋八月得請東
歸今儲皇賜以四明洞天四字始有意於為圃揭是扁
榜作為林泉以彷彿四明之真境日游息其間四海名
下士方外知識時款吾居與之共譚名理且約不以腥
穢浣吾勝地今將落成命工塑四明山王與先生之像以

奉安焉庶幾英靈時一至止以壽我此山視方丈蓬萊
天台相與不磨滅也千秋萬祀永錫我後香火之奉罔
敢寂寥

迎奉城隍并惠濟王祝文

鄆山蟠英甬水揚清鍾靈毓秀入於鄆城中有吉地背
負州治波環四圍火聚佳氣昔為驛亭以舍使星既遭
兵火酒壚是名喧喧沽肆糟丘漸漬一旦天恩舉足以
賜其賜伊誰實某東歸玲瓏高峯歛灑深池蜿蜒樓閣

風煙灑落咄嗟以就深宜行樂伊維吾家得是光華傳
之後裔綿及無涯天造地設幾經歲月忽蒙皇慈廣此
闕閱共惟大王閼厥土疆專以遺我作為寶坊願移威
力護持泉石鍾鼓園林子孫千億令此一方安富久長
錫我史氏享茲繁昌直下萬世忠孝相繼期王香火永
永弗替

焚妻贈黃祝文

某踰冠受室即與夫人約曰某不夭先考即世已久慈

親在堂與兄弟五人其實居長承顏順色理合率先故
日供定省夜則抱衾以待未嘗處於內也夫人安之復
戒之曰吾家四壁汝貲囊雖薄不可少靳毋使今日有
違而異時有悔則予汝宜夫人聽之於是罄竭以備甘
旨裘葛至其自奉則澣濯麤糲幾無以充其口體宗族
稱孝焉意者積德既豐必生享厚報暨其遭際聖主恩
寵隆特而夫人沒已數年不及見也每一念之酸鼻流
涕粵自紹興三十一年至淳熙元年某備數宗正少卿

乃封恭人及為侍從為執政為尚書右僕射為觀文殿
大學士為節度使為開府儀同三司提舉臨安府洞霄
宮遇郊祀大禮追封邠國夫人淳熙四年三月某除少
保觀文殿大學士充醴泉觀使侍讀永國公妻追封鎮
國夫人淳熙五年三月某除右丞相衛國公妻追封蜀
國夫人淳熙五年十一月某解罷機政除少傅保寧軍
節度使充醴泉觀使兼侍讀賜第于行都妻再封蜀國
夫人淳熙六年九月某遇明堂大禮妻追封魏國夫人


淳熙八年五月某除少師依前保寧軍節度使充醴泉
觀使魯國公妻再封魏國夫人淳熙九年九月某遇明
堂大禮妻再封魏國夫人淳熙十年十月某除太保依
前保寧軍節度使改封魏國致仕妻再封魏國夫人八
加敷錫未曾恭款松楸薦此異數是用精擇吉辰以淳
熙十一年十月望日躬率諸子若孫若曾孫與諸親姻
迎奉贈告展禮燔黃副以衣章告于幽域恭惟夫人艱
難貧悴雖備歷於生前顯赫寵榮實有光於身後英魂

可無憾矣予心尚庶幾焉伏冀鑒歆祇服睿訓滋繁遺澤克祐本支覲此光榮繼繼承承益加隆厚雲仍百代忠孝不渝是為餘慶使積善之效取驗吾家不勝大願

葬五祖衣冠招魂祝文

某少遭閔凶備嘗孤苦壯依陰德獲塵仕路爰從初階至於右輔歲時祝先三廟鼎俎原所自出每懷悲慕淳熙戊戌聖主錫予許立家廟祀五世祖時方罷政賜第在所越三四年請歸鄉土乃克興工作新棟宇敷陳帷

次以奉神主惟五世祖高祖父母二代五人實無墳墓
春秋汎掃哀無所寓子孫相視顙泚色沮遂諏吉壤以
圖安厝棺椁衣冠既周而具像形如生招魂合祔東湖
之東下水之塢峩峩仙塋松楸繁森肆涓良日西望城
府迎致英靈歸歟安處祈招之辭載之別楮靈其來兮
旌旗掀舉既宅斯藏妥寧千古祐我億載益昌厥緒蠲
潔致告奠茲肴醑惟靈歆之悉如辭語



鄭峯真隱漫錄卷四十二